

未鍛暫架空中樓願供列仙玩

中秋游村田一峰鵠沼松露園賞月得七古一篇
天風八月秋之中碧雲四卷銀濤通倒涵嶸崢峿嶽
斜抱縹緲虛無宮空青一片不知海杯中只覺滄溟匯
沙平水息弄潺湲日落煙消聞欵乃欵乃聲遠天彌漫
一羣人影生微瀾傾域名士各三五待與明月相團欒
寒潮已上月未上月旋欲上潮乍晃月輪半輪忽一輪
青天碧海齊晶朗玻璃世界空明間先見香霧生雲鬢
玉宇清寒素鸞路銀河清淺白蘋灣雙行聯臂印芳躅
月明如水人如玉顧影最憐明月心流光欲濯玉人足

風吹裙帶何仙仙羅幃無塵波亦妍此身恍隨步虛佩
髣髴笙鶴來瑤天萬古月圓如此好徘徊直欲凌蒼顯
流雲飛下蓮華峰若有人兮天女島何處關山哀笛中
誰家砧杵動秋風不照清歡照幽苦無情有情月本同
多謝主人興不淺綠尊紅袖懷抱展浩歌欲賦鵲南飛
微醺不覺月西轉玉人扶我影在沙比肩笑整釵髻斜
踏月無聲露滿地風松子墜如桂花

送宇田滄溟

友

歸土佐用留別原韻

酸鹹誰辨水中鹽吟苦翻尋詩味甜末力何須挽強弩
微辭常得自香奩論文幾度邀尊酒分袂中宵促漏籤

笑指銀河出門去定知簾肆有人占

豈有麻姑癢處搔書生滿腹是牢騷
鈇三彈歇風塵莽筑一聲孤天地
高夢欲隨君向溟渤狂聊復爾醉葡萄
舉頭白玉盤如水想見流光照大刀

奇才如此鬼應呵涉險未尋安樂窩
東海揚塵濤若馬南荒披髮劍驅鼉
平生詩愛題襟集昨日春憐換扇婆
臨別不成兒女語朗吟飛去夜雲多

送落合東郭為賦游相州

仙姿玉立笑牽裳欲鼓天風汎碧湘
午聽松濤琴亦韻晨熏薇露句應香
綠流素舸銷三伏如沐青山坐七湯

若向平泉問花木爲言鷗夢近滄浪

西岡宜軒通明赴任函館有留別詩七章選韻極苦

中外名士爭和次之以餞其行予亦效顰

逍遙以外亦何有北海鯤鵬是師友
底事君詩惆悵多轆轤一轉腸回九

朔鴻關笛夕陽裏何草不黃秋萬里
如此山河開別天九郎當日未曾死

蕭蕭班馬別何堪聊與英雄助偉談
日照銅標消積雪幽燕東北薩連南

高秋雕沒野茫茫決皆陰雲限異疆
正好挾山超北海

未應披髮下南荒

天以奇游試碩儒定知教化徧荒區五稜城上如霜月
皎皎冰心不負吾

一卷南華忘我物幾曾歎此久居鬱衙齋草綠夢江南
蝶亦不知周亦不

欲往從之秋隼健長天一擊了初願與圖誰劃古蝦夷
直北浮雲未無恨

九月二十三日招同錦山青厓種竹敬香岐山霞
庵寧齋六石湘南琴莊晴瀾諸友會麴壘之舊窠
創星社之新號龍集鳳會霞蔚雲丞詩道於焉振

興英才嗣後徵逐小子不敏豈敢公建騷壇之幟
先君有靈伏惟冥扶大雅之輪爰賦七言律詩四
章以申謝意兼紀盛事

白袷烏巾聚草堂黃花翠竹傍苔牆會無規約惟真率
酒有觥籌任放狂廚恥一盤堆苜蓿筆期萬丈吐光芒
胸羅廿八星爲社終勝金釵十二行

遺山昔日辨清渾疏鑿何須仔細論李杜從推大宗主
曹劉誰泝古淵源新聲花豔春微笑別調琴幽菊不言
若比昌黎山石句女郎詩旨最溫存

才情浪博大都傳骨欲清奇語欲圓李賀酒魂堪喝月

未應披髮下南荒

天以奇游試碩儒定知教化徧荒區五稜城上如霜月
皎皎冰心不負吾

一卷南華忘我物幾曾歎此久居鬱衙齋草綠夢江南
蝶亦不知周亦不

欲往從之秋隼健長天一擊了初願輿圖誰劃古蝦夷
直北浮雲未無恨

九月二十三日招同錦山青厓種竹敬香岐山霞
庵寧齋六石湘南琴莊晴瀾諸友會麴壘之舊窠
創星社之新號龍集鳳會霞蔚雲丞詩道於焉振

與英才嗣後徵逐小子不敏豈敢公建騷壇之幟
先君有靈伏惟冥扶大雅之輪爰賦七言律詩四
章以申謝意兼紀盛事

白袷烏巾聚草堂黃花翠竹傍苔牆會無規約惟真率
酒有觥籌任放狂廚恥一盤堆苜蓿筆期萬丈吐光芒
胸羅廿八星爲社終勝金釵十二行

遺山昔日辨清渾疏鑿何須仔細論李杜從推大宗主
曹劉誰泝古淵源新聲花豔春微笑別調琴幽菊不言
若比昌黎山石句女郎詩旨最溫存

才情浪博大都傳骨欲清奇語欲圓李賀酒魂堪喝月

劉又詩膽亦如天三年苦思纔沈著一字風流便自然
我與滄浪翻舊案箇中神悟不關禪

琴尊坐嘯不矜工只願江河萬古同標榜敢爭才子氣
性情應重雅人風俱霑聖世升平澤謾做詩衢割據雄
萬戶千門那有別謳歌齊頌建章宮

贈國分青厓用其華嚴瀑詩原韻

并序

青厓風雨觀瀑歌傳誦藝林副島先輩一再和之青
厓依數疊酬每一篇成則示之森子且曰我嘗浚芙
嶽之高涉南溟之險奇氣填臆形諸文字者不下百
餘篇而意猶歉焉近又卜居春日山莊有調護池蟾

蝮窟天狗巖鐵骨梅諸勝箇中息影吟嘯自如其快
亦有不可言者子何不替我一暢敘之森子欣然首
肯握筆疾書卽成此篇

放眼天下名山空胸中五嶽高崿嶸卽今海內作長句
意氣獨讓青厓雄神光奕奕暘出谷元精耿耿星麗穹
鬚髯戟張骨卓立吸噓廣莫閭闔風嘗登芙蓉峰絕頂
蒼茫獨立青濛濛出日入月割夜半洞冥燭見方諸宮
神仙幽怪之所宅兜羅縣雲旋萬重一風拂之忽無迹
但聽稷稷鳴羣松歸來大悟變化理詩成使人三日聾
匍匐鞋襪夜雷電破壁風雨來洶洶調護池迸鐵骨出

天狗巖裂蟾窟衝纖兒震懾君大笑憶昨破浪乘緣幢
鯨吞鼉作潮逆立蒲帆十裂颶母攻當時檣樓嘯白若
矧今此屋聞闐蓼杜陵突兀思廣廈丈夫豈復辭固窮
山巔海角盡詩料敢誇一篇觀瀑工華嚴百丈吾未覩
想像陰壑騰虜虹恐將冥搜傷刻劃吟苦幾別秋燈紅
不如賦君得意事硬語一任兒曹恂臨風浩唱欲飛去
爲君點破無睛龍

重陽黎菴齋公使登高雅集見示留別詩二章卽
次原韻奉餞

秋意平分海與桑三山樓閣奉離觴六年此會纔風雨

年年會日皆屬
快晴是日忽雨今別何堪又夕陽舟楫中流期共濟敦槃兩國
願偕臧瓜期縱及茱萸節不改菊花依舊黃

臨觴忽忽有餘思安得星輶永不移賦壓登高大夫列
花尋衣白野人期滿城雨冷江楓落一夜天寒海水知
極日濤連徐福墓可堪酌酒重題詩大使前游南紀問徐福墓
存詩十數篇傳誦一時

陰曆十月二十七日黎菴齋公使招集公署侍醮
殊歡謹呈二律恭送還輶

輔車相濟國交深重繫乘輶一片心仙島龍蛇紛漾日
祖筵冠蓋藹如林針頭海路羅星宿濤外天風鼓瑟琴
繡斧更應排霧去蚪南瘴氣漸陰森

北邊控帶亦悠悠滿眼山河莽自愁鎖鑰須教嚴韎鞞
波濤詎肯逆琉球兩家長計聯衡策全局危機借箸謀
知展輿圖奏丹陛東皇久已重同仇

美人曳旭圖歌爲宮崎生囑

五銖風舉雲羅羅疑駕鵲羽凌銀河嬋媛之子非織女
亦非宓妃非嫦娥輕綃一幅曳晨旭扶桑若木紅枝柯
慘慘女手可轉日魯陽壯士空揮戈母乃玉皇不愛武
終朝荒蕪崑崙阿白雲在天陵自出王母侍兒相踏歌
驚鴻游龍看變化反腰貼地鬢雲拖戲教白日作丸弄
安知此舞非天魔我初一見日爲奪奇哉此圖理則那

靖洲古稱日出處寧許陰物來婆婆晴瀾漁郎嘖然笑
夫子見少斯怪多泰西粉本借諷俗豈同雲雨荒唐科
山海經曰東南隅甘泉有女名羲和古來謂爲日官者
孰辨彼真此則訛矧今冠裳盡顛倒有頗其弁屨舞雩
中堂霧質衆嫗竝無晝無夜呈蟻蛾蚪壺銀箭不知數
羅襦薺澤耳鬢摩黃金百鎰珠十斛銷入紅顏嬌一渦
瞿瞿良士心不樂無如舉世貴祝鮀人妖禍水眼前在
詎用展此空媿嬰漁郎漁郎勿復言言非其職聞者呵
卷圖默誦李白句東方漸高奈樂何

芳山懷古

翠華春闕寺樓霞飛去飛來頭白鴉啼繞延元陵上下
夕陽紅煞古都花

殘局支持五十年行宮明月幾回圓南朝自是櫻花國
一度春風一泫然

雨淋鈴夜月冥濛一曲哀笙奏欲終樹底樹頭花不見
青山明日杜鵑紅

野棠花落雨瀟瀟玉匣珠襦共寂寥我與天家悲宿草
不知南北是何朝

烏生八九子

畢逋屋上烏夜夜啼不止問烏何所悲烏生八九子雄

飛朝入煙求食日中市暮歸雌含哺啞啞衆雛喜野田
有黃雀山澤有白雉決起雖云樂終抱羅網恥不若烏
將雛甘守破巢裏既免鷹隼猜豈希羽毛美相顧盡天
倫只願永如此金柝飛嚴霜淒氣砭骨髓一雛卒被病
一雛旋已死須臾八九雛憔悴扶不起母烏哭號啣父
烏凝涕視恐傷母烏心背面強長踣夜雲慘以黑酸風
吹棘枳摧藏父母心天地長已矣哀哀復哀哀悲鳴動
人耳啻我亦吞聲淚下如流水

槐南集卷十二

槐南集卷十三

東京 森大來 公泰

辛卯

新年試筆

大蜻蜒島跨金鼇莽莽春平絕海濤玉甕山河霞氣麗
蕊珠宮殿漏聲高君臣已見風雲會衆庶俱分杼軸勞
我輩升平無所補愧將刀筆佐蕭曹

南繩北幌盡神區東汜西崑入壯圖駿甲芙蓉晶積雪
武毛原隰豁平蕪休教元首廢叢挫僉望羣公對拂吁
澤及山林榮草木未應仁義獨騶虞

黃金斗大紀勳庸憶昔函山始撤烽東下六師如破竹
中興五爵得攀龍回巒挂笏煙霞涌合殿垂裳雨露濃
二十年來銷甲盡可能滿地鑄春農
醉對野梅拚獨眠春生御柳早吹煙省臺俊又何多士
輦轂詞人盡少年騷雅也應持有主風塵敢卽脫如仙
一官雖拙才難棄詩卷俱期後世傳

新春漫興

硯雪氈冰不作春謾教黃鳥喚年新打頭屋小羞花笑
到手杯遲怕客嗔何處當投滿懷刺吾家恰配一盤辛
詩中味與侯鯖別誼避朝驂隔巷塵

拖金橫玉鬧春城誰向池塘覓句行綠水如迎油壁影
東風先愛繡簾聲山如可笑難爲畫花本能香不負鶯
似此韶光惟夢見曹騰我亦太癡生

虛名十載謾商量情不嫌柔性愛剛小隊彈箏美人社
短衣說劍少年場漸無筆可遭春潤始信才終爲酒荒
兒女風雲俱過眼先生詩債幾時償

禁談時事忌論錢吾輩中人別一天繁法如毛不曾讀
耽吟較奕似猶賢平生除酒頌何令大抵於詩選有權
昨夜梅花笑相告絕無春處占春先

一月四日送神波卽山樞還阪本三橋招同永阪

石埭水野大路

遊

永井禾原

久

杉山三郊會飲湖

心亭舊雨一尊悲喜交集賦十絕句雜然無次第

聊以志吾懷已

茫茫生死一尊前數盡湖亭聚散年拚向春風齊灑淚

垂楊跪地雨濛然

天龍小院斷鐘空蒿里哀歌唱未終花草蓬蓬春欲遠

青山黯在暮愁中

一年能幾醉湖亭亭上鴉鬢眉黛青嫵雨如酥水如酒

拋人柳眼為誰醒

主人標格玉同溫只訝青衫有酒痕紅粉兩行似相識

十年花影盪銀尊

越調吳歎且勿譁春寒細雨夜簾遮停杯側聽郎君曲

小閣疏梅忽一花

酒間三橋唱小
曲一坐擊節

琴尊還共玉池仙吾羨君家壓歲錢買盡春前香息息

梅花尺幅夜生煙

去年歲除夜同三橋錦山聚玉池祭詩龜主人有
寒燈聊換宜春帖乾筆仍分壓歲錢之句故云

酒場謾歎昔人非書記風流逸興飛他日相思能瘦否

水仙今夕壓環肥

大略體肥
故戲之

二妙聲名諫洛都裙釵也識祕書殊比他賀監風情甚

欲向紅妝乞鏡湖

禾原現官文部大臣祕
書官故以賀監擬之

崔護重來路不迷無端一曲感前谿舊時門巷桃花笑

恰恰新鶯隔雨啼

三郊前僑居鶯鶯故及

哀樂紛紛竹與絲當筵強自譜春嬉恆河劫後荒寒柳

忍和家翁絕妙辭

先大人有小西湖柳枝詞一卷

十二日訪副島蒼海公

種臣

遇待殊殷天寒甚公親

手爲余加裘所尤感激率次公席上原韻奉謝

園林禽語值年新厲翻高揚尙擊旻誰與同袍雱欲雪
公偏挾纒煦成春感深且幸知交厚俗薄翻嗟酒味醇
吾道提撕憑斗柄當教列宿衛鉤陳

擬古

正月飛繁霜朔風率已厲煌煌京洛衢慘澹單闕歲玉

衡安可齊金吾儼相衛擊筑聞狗屠張弧指狼戾詭言
探丸兒白日匿甲第堂堂公會上鼎沸等蟬嘒靈均旣
獨醒君平亦棄世難卜詹尹居敢效簾肆閉仙人跨鸞
鶴君子佩蘭蕙苟可同襟期攜手從此逝去去謝賈生
遲遲徒雪涕

出門忽不樂門外亦多塗借問車馬客意態一何殊黃
金纏絡索白玉鳴鹿盧飄塵卷飛電揚鞭疾馳驅以勢
伏他人冠帶無賢愚夕宿邯鄲倡朝拜平陽奴人生貴
得意得意徒區區與爲晏子御寧作羅敷夫終朝公府
步不願牆上趨

春風謠

花枝欲語鶯乍咽今年春風太奇譎東都不雨寒中人
南國遙傳一丈雪夜半妖鳥如鬼車諄諄銜火吹劫沙
西鄰伏枕東鄰斃婦正嗚嗚兒亦哇只覺春生北邙道
更看焦土長芳草豫想清明寒食時新墳無數從何掃
爾時花笑鶯舌香似言天意不可量任君氣焰炙手熱
議政門閉鐘鳴霜

哀辭一章

乘箕忽焉往風雲二十載人間下仙鶴天下想風彩汎
源俟舟楫和羹望鼎鼐梁木一旦摧哀哉失元宰緬昔

中興初天心禍未悔操戈同室兵激變京闕殆外國眈
虎視列藩動驕怠幕議徒沮喪廷論紛冗猥公以瑚璉
器唱義徇朝采同濟誓扶顛七卿俱引罪濁浪排長門
橫流不可匯筑紫何冥冥鬼火射鏿鏿寒聲聞月明馬
骨傷霜曜百艱志不移炯炯寸丹在王業當維新草創
百度改魚水諧君臣拳拳鞠躬每廟略掌絲綸積弊除
痲瘡大事先憂虞小心敢萎腰端嚴貴持重醇謹不自
給清節推再世勳德冠八愷伯仲見伊呂視丕才十倍
東閣延名賢綠野面爽塏下有汎汎鷗漁歌答欸乃丹
篆留印賞珍異絕珠琲翰墨騰晶輝光豈在組綵相業

亦如斯袍笏羞傀儡晚營晃山墅林亭倚崔嵬沸水鳴
潺湲危巖峙礧礧當崖產紫芝沿澤長芬苳笑濯簪纓
塵臨闌手承顏觴詠從鄒枚悠然樂窠窠如余樗櫟材
亦忝青眼待長記鸞鳳姿俄驚晦光彩至尊親哭臨四
海氣頓餒擗膺喪慈母哭泣任衣浼時維辛卯春二月
花破蕾花木亦慘澹風煙空蕩駘回首對鷗莊春水自
濯濯浩蕩沒不回鷗波淚成海

鐵丐道人將赴九州索余贈詩卽賦短歌以送之
鐵丐道人鐵叵屈鐵之心肝鐵之骨三年窮旅髮鬚鬢
滿街風雪聲寒乞歌姬一笑十萬錢道人一哭無人憐

便謂京華不足住西將狂走荒山川鐵鞋踏破南雲去
孑然一身九州路非行路難知己難誰見道人立腳處
昔聞奇人吳六奇海寧詞客肝膽知愧余綈袍枉戀戀
家無百金贈以詩丐乎望汝無他事皴雲一石從天墜
酒酣同唱雪中人一擊將軍鐵板碎

戲題三宅某新著

善根眞理美淵泉世界文明從我宣不比莊周虛說劍
誰云鄒衍誕談天大瀛海外氣嘯吸全地球同筆轉旋
便代一枚廣長舌彌空花雨散君前

人心死

某也

人心死寧有此渠亦神州一臣子匪鬼匪虻匪蝎匪蛇
如何頭其人而鳴其畜邪一解鄭芝龍海寇耳鄭成功知
大義賜姓始末誰不聞父罪云贖矣噫嘻卽見悖逆孫
三解投有北卑豺虎惡惡急鳴吾黨鼓剛爾心剗爾腹屠
爾腸啗爾肉天下公憤始一伸亦可以瞑爾祖目三解咄
咄怪怪怪青天白日此大罪殺不盡惡有餘三尺劍
一紙書買強鄰歡賣我國文字姦雄名教賊四解

送日下部鳴鶴

東作

游清國次畱別韻

翰墨風流天下名箋麻素絹寄斯生而今東海平如硯
好寫煙波浩淼程

萬國帆檣連滬瀆三更絲管沸蘇臺月明海涌峰頭路
細搨顏公石刻來

棗木失真吾弗爲半肩書畫一囊詩歸來片紙須珍重
鉤盡風摧雨剝碑

黃樓吹笛送扁舟笠澤聞鶯春欲愁細膩風光西子笑
酒痕依舊是杭州

玉池仙館小集席上作

柳陰路曲絕紛譁竹影窗移六扇紗點石蘚苔嵌篆字
滿船書畫祭梅花索詩妓贈齊紈素擣藥童欹兩髻丫
客至欲談禪悅味幽龕十笏靜煎茶

一杯花影夕陽新七子風流意氣親是日會者錦山青厓種竹岐山寧齋及余并主人恰爲七人他日題襟編總集祇今領袖屬同人江南別調徐昌穀歷下先聲謝茂榛標榜不須煩月日且傾烏帽譜鶯春

美人汲井圖

綠鬟曉汲梅花井貪看井底梅花影花上流鶯忽一鳴回頭釵溜井波冷沈釵無聲波不知花影自迷鶯自疑含情脈脈不得語那堪還插梅花枝

春事闌矣東台墨水諸勝走馬看徧頗有孟郊春風得意之態因賦七律六首紀之予戒綺語已久一時興會所到不能自禁故末首聊當解嘲

春風何處最相思西子湖頭柳萬絲雨染晴熏濃似酒鶯喧花妥豔于詩銀箏小隊歸須緩鈿鼓雙輪到怕遲更向墨江觀競渡一船年少笑挑旗

墨江春水漫橫塘匝而櫻花豔兩行桃葉畫船尊亦綠梅兒香冢土應黃榆錢誰擲吹簫丐蘭眼爭迎挾瑟倡白袷紛紛過渡去竹西歌吹鬧斜陽

裙屐稍稍斂輭紅齧齧微磬佛煙籠穠花好藉觀音力嬌鳥如呼少女風聯臂而歌皆翠袖同心欲結有青驄阿誰遙揖浚雲閣現美人身是彩虹

楊柳橋頭子夜歌東風無賴悵如何煙花似夢能醒少

鶯燕經春欲嫁多紅粉幾曾憐小杜黃金真合鑄髯坡
寧知情逐朝雲散不與才人伴轆軻

伊人宛在水中洲
錄曲闌干認枕流
蘭漿波回春澹沱
花簾夜卷月句留
采芳拾翠邀佳約
擊鼓傳觴憶俊游
今日蕭郎空落拓
依然笙管滿高樓

華年綺語記曾經
果有違言不忍聽
被酒也應名教罪
買花端乞孔方靈
吾詩近日頹唐極
是夢三春約略醒
卻悔太癡刪未盡
幾番風雨護金鈴

促寧齋作詩因而戲之限蘭字

兒女情多春欲殘
花盟一日未應寒
較他止酒原容易

誰道敲詩是大難
病後襟懷仍落落
少時神骨本珊珊
寡儔嗟爾更無偶
可配回文蘇若蘭

竹磻幽居小集分得垣字

我是風流辛稼軒
斜陽煙柳悵無言
此來不道花辭樹
欲去仍猜蝶滿垣
昨夢回時又風雨
新陰成後乍晴暄
危闌倚盡添依戀
宛似當年茉莉園

歸雁操

歸雁操森子和滄海公也公有栖遲窮北之志森子
以爲出乎傷時慨俗之不得已也故效其體而反其
意焉

余北征兮歸紫塞望玄冥兮路幽昧聞胡笳之劉曉兮
冰峩峩其將潰傷邊馬之夜嘶兮惜桀狗之晝吠夫鯤
鵬之將化兮對雕鶚乎心痠穹廬合兮陰霾晦寒門閉
兮白日曖就顛頊而斂羽兮可以申臯陶之喙也離羣
而索居兮固不忍爲此態也銜蘆自悲兮恐時之不可
再也重曰玄雲瀕洞風慘栗鸞臬不分鳳不出隨陽之
雁嗚嗷嗷翻飛天池宵續日

問寧齋病悵然懷舊

十年前伴病維摩一榻論詩帶醉過今日春寒君又臥
櫻桃紅瘦夕陽多

漫興七絕

涉趣閒吟日未斜小園春老漸無花燕來紅蹴泥芹壘
雨歇青生石竹芽
未有石榴紅灼灼旋看桃葉綠萋萋夜來雨漲清谿水
流到牆頭汎白蘋
小槽擊酒且嘗新風日清和四月辰櫻後廚寒惟有筍
簾前鳥喚更無人

道人種藥兩三畦兒女尋花前後谿半作山中白雲夢
故園望斷夕陽西

池塘鳧母又將雛爲倒鴛兒酒百壺喜見汝曹眠正穩

泫泫春水綠平鋪

女手摻摻桑葉柔東阡西陌綠陰稠蠶姑俱說秦家婿
只羨黃金絡馬頭

蝴蝶蜻蜓紛下上菖蒲芍藥竝芬芳花開花謝無拘束
手有春風筆自香

雨日感興

崇朝不見客其雨來淒淒啓我南軒窗卉木垂柔萋綠
樹當孟夏滋蔭漸已齊桐生靡所詘豈謂心賞睽獨余
悵感物宿昔桃李蹊花不飛上天忍委濁水泥燕來自
華屋翩翩銜泥啼亮無拂霄翮暫就茅檐栖

悵望有得

明月不可撥浮雲心自閒鶴聲一千里飛度三神山清
淺幾時變樓船何代還徘徊謝孤燕珠樹杳難攀

五月十一日有賊傷露國太子於大津干連兩國
事體極大中外繹騷樞密院徹宵秉事十二日

皇上幸西京十四日副島樞密持樞密院議長以
下十八人連署書往西都唁問大來從焉車中次

樞密原韻

絡繹傳書日載塗樞臣多向洛陽趨平生小伎愧何補
輟筆叨隨經國儒

鴨西寓樓雨中次樞密韻

午鐘隱隔翠微峰
鴨水生漪煙雨濃
絕似若邪谿畔寺
青鞋布韞許相從

西都紀事詩

紅塵飛騎走長楸
爭望平安古帝州
綠草鴨河春水滿
翠華鳳闕暮雲愁
十年再見衣冠會
三日不聞絲竹謳
自是九重宵旰切
合無人醉夕陽樓

憶昨聯歡綺紵初
吹笙鼓瑟擁金輿
嘉賓有禮鄰交重
刺客無謀劍術疏
梃擊獄滋三大案
杞憂禍作一封書

二句借用
明季事

重勞車駕蒼黃入
蠟淚宮門夜月虛

庭燎通宵晰晰光
傳宣中使立彷徨
天顏不悅咨湯藥
御饌頻停撤酒漿
旋見蹄輪趨玉闕
定知夔契侍金牀
綸扉事祕無人識
溝水聲回但斷腸

車如流水響如雷
晨召羣僚帳殿開
豈放商巖采芝去
亟教安石出山來
中興一度艱危局
上相尋常尊俎才
會待長沙宣室問
滄浪漁父謾遲回

我皇親掖病痍行
鳴馬蕭蕭出洛京
輦路山河淒欲涕
樓船笳鼓肅無聲
銀濤翻日魚龍拜
練甲如星鹵簿迎
自古修交寧有此
北鄰臣子定傷情

颯爽鬚眉儼若仙
據鞍誰識濟時賢
老臣骨鯁頻徵入

天子樞鈞自運旋河嶽英靈環黼坐雷霆精銳動台躔
更依北斗望京闕聞說中宮少晏眠

市俠奇勳賜錦袍府君嚴譴首徒搔天家賞罰親裁鑑
畿甸風煙遞繹騷可有大臣俱引罪只聞匹婦自銜刀
宗周未隕渠何恤機杼應歎漆室勞

東山鐘出亂雲層上有迎鑿灑掃僧複道哀湍激松吹
寢園暮雨溼螢燈一夫釀禍誅須必四海驚心變未曾
獨使官家憂罔極明朝駕幸月輪陵

二十一日 車駕還京春畝滄海諸公在扈從之
列大來亦厠供奉末班率用春畝公原韻以志喜

千鈞一髮繫危機喜見諸公隨輦歸袍笏澆塵莫遑拂
昨來天子尙宵衣

小川岐山 牧 宅與寧齋湘南霞庵飲分韻

西都十日翠華臨費盡天皇宵旰心昨者小臣叨扈蹕
諸君東洛共聯襟相逢白社依然盛只覺銀杯爾許深
岐山出所藏銀
桃核杯侑酒 好頌聖恩波浩蕩江湖廊廟兩斟忱

送松永聽劍 誼 行北海道

雲沙黃黃朔風怒一鶚搏天朝北斗七星破碎濤四崩
千島蒼茫月半吐酒中餞爾休蹉跎何必罷琴惆悵多
醉爲瀏灘渾脫舞試和天山勅勒歌天高野曠飛鴻滅

貂裘被酒雪花熱南山射獵箭在腰白是熊皮赤熊血
歸來大笑馬蹄乾隴水生骨鳴珊珊眼看戍卒從軍樂
未覺書生出塞難憶昨至尊幸西洛禍機毫髮爭一著
聖裁幸免邊境憂國論仍嚴北門鑰室蘭港上冰如山
石狩川北車班班君閒日暮聞蘆葉回首雲濤渺莽間
曲終停杯忽不御忍說宸衷吁咈處望中咫尺海參灣
強鄰太子裏創去

海參灣即
浦潮斯德

題德富洪水

一敬

詩草後

紫筑茫茫百尺濤阿蘇噴勃嶽雲高天將靈氣聚熊本
代見偉人生鳳毛老後對山情漸澹少年觀海興應豪

詩成不覺滄桑換繞膝萊衣映道袍

送落合東郭歸省熊本

君家外祖公輔量主知特達嘉勤讓鶯花富貴開畫堂
文彩風流映絳帳至尊聽講屢咨嗟卽今松柏鬱新壙
尙想姿儀朗照人諸孫乃見朝霞狀君也翩翩尤軼羣
葩流才藻吹蘭芬五陵年少游俠子豔君衣袖不須熏
洛陽美女花窈窕乞君手書白練裙君以清門能自重
掉頭直指鎮西雲驪歌爲唱河梁柳祖塋先酌夕陽酒
當時禮數儒臣優祇今氣誼詩盟厚明日阿蘇山翠新
有一青衫躍馬走詢是東野先生孫滿城士女一回首

佐野顧問

常民

令愛忌日賦奠

子規啼歇雨淒其想見高堂慟哭時謝女清才空詠絮
曹娥遺範枉書碑夜來明月生虛幌昨日春風冷總帷
忍唱人生朝露句秦嘉臨去淚連絲

令婿常樹君
將赴海外

同都門諸雋送橫川唐陽歸信濃

毋多酌我此尊前一別經時聚偶然塵尾風流晉人物
馬蹄雲霧蜀山川擲觴來日乍流水回首今游當在煙
勝會誰如鱸膾興鷺湖秋漲采蘋船

送栗田鶴渚

矯

歸備後

杜鵑山上思歸鳥著意啼時君不歸七月王孫芳草長

滿城風雨故人稀曾經燕子夏來見底事鷓鴣南向飛
到日空尋迸林淚雲蘿老樹舊柴扉

蒼海公招飲偕樂園驟雨卒至芭蕉滴瀝與隔簾
琴筑相和余佇白蓮花下聽之微吟一絕狂興殊

王

涼聲雨打芭蕉葉倩影鐙搖菡萏花小閣繁絃還可聽
美人團扇莫相遮

次韻佩香女史贈寧齋詩

秋風都入蟻蛄吟不解春愁以外心魂亦堪銷喜詩豔
香如可佩愛蘭深然脂暝寫鴛鴦字背鏡偷投翡翠簪

只怕涼紈同見棄焦桐未敢許知音

山陰岡島某以國字譯元人西廂記索予題辭戲作二律

天壤王郎恨不倫曾經滄海亦迷津會真有記空才子
補過爲名是忍人蒲寺鬘雲春側枕草橋眉月夢含顰
始知實甫西廂妙幻作空華未了因

明月溶溶花拂牆幾人真箇讀西廂老僧三昧秋波轉
妙句六朝金粉香聲亦奚妨存鄭衛咀之不盡是宮商
由來混沌應難鑿勸爾臨毫莫孟浪

與湘南夜話雷雨驟至戲賦

驀然涼一陣欲掩燭無功天黑雨垂地颯狂雷鼓空先
生驚世去其意與人同今日風雲筆多慙失箸雄

古中元夜與青厓岐山寧齋且飲且談得長古一篇興到之語固有不入格者也

今夕何夕秋中元河漢耿耿星搖垣五三六點露流去
但見明月生疏軒月來如約客不速忽復相對三人尊
尊中見影啞然笑不知此月誰先吞青厓自稱有仙骨
一斗百篇腹可捫平生臧否不挂口濁賢清聖那須論
世上小兒眼皆肉月中素娥當我奔手擎白兔所擣藥
錦袍并奉太白尊寧齋戟手曰否否天下正作秋蟲喧

任爾洪鐘絕纖響聽者掩耳空啾啾吾詩非唐況趙宋
非江西派非西崑可師輒師性情在要看靈爲文字根
興來酒氣沸十指擲觴嚼墨橫空噴只今心地朗如月
肯容吳剛斧鑿痕我謂此言極痛快又愛妙舌工瀾翻
岐山近自粵中返默而不語髭徐掀心香一瓣浣花杜
神完氣足雄與渾江河萬古滔不廢倒流三峽開詞源
冥搜豈求模擬肖神解未辭箋註繁長安同學謾見笑
欲使詩教崇溫敦門生盡廢兔園冊田家輟唱老瓦盆
偶看明月促歸駕閨中免銷虛幌魂今來同醉一堂月
三人喜有同心言嗚乎心同趣乃異變化只合從鵬鴟

月盈月虧月不管觀者心動如風幡天官驚奏欲萬丈
三星今夜萃麴門霏霏談吐雲益起一時月亦光黃昏
誰其主者吁可怪醉肆狡獪猶留髡三人掌底一丸月
陰運諸掌三畝園

朱鷺

朱鷺下蓮蕩隅爾何食蓮蕩魚蓮蕩蓮花色香紫朱鷺
之朱奪不死飾爲鼓鼓逢逢其衷如火諫者撞

思悲翁

思悲翁翁何悲我有梟子飛去何之飛去尙可飛來殺
我思悲翁翁何思梟子食母淚下連絲淚下尙可淚枯

殺我舌乾脣燥兒孫聾人間無數思悲翁

艾如張

艾葉蕭蕭風肅肅雄狐綏綏虎逐逐張羅張羅艾葉間
中有機牙不可觸狐竄伏急一蹠視狐而外虎無目虎
騰撲血出漉狐大笑虎大哭

上之回

上之回翠旗懸蜺車如雷左龍右虎前朱雀上有青鳥
銜書來書中何所有王母晝醉瑤池酒白雲在天不能
來故遣雙成諧怨偶仙可求國可亡千秋萬歲樂未央
三十六宮井梧墜可憐鉤弋夫人淚

戰城南

杞梁之妻仰天哭長城崩塌陰山蝨馬嘶郭北蒲葦風
烏食城南野死肉烏飛上天征夫一去不復還馬老識
塗梟騎一蹶死道隅白骨瞑目作人立哀絃如雨淚迸
粒一聲一聲天亦傾城可崩人不可以生

巫山高

巫山高巫山萬古高巫山之高不可測襄王魂魄徒勞
勞巫山雲神女來時朝氤氳不聞神女夢中語只聞世
有襄王墳巫山雨神女去時暮飛舞不聞襄王腸斷聲
只聞哀猿峽中苦猿三聲天如水巫山高非雲非雨峰

十二

上陵

上陵暮鴉啼下陵野雀栖不知陵下何王骨但見衆草
秋萋萋漆燈照君室寶蘇著君袂玉魚銜君口蠙珠絡
君髻哀哉君弗知金盃空出世當時鐘鼓饌玉貴一盃
麥飯無人祭無人祭冢纍纍今我不樂西風吹仙不可
學死知之

將進酒

父在堂我奉一杯酒母在堂我奉一杯酒婦來前奉我
一杯酒兒來前奉我一杯酒天倫樂事亦無窮悲夫已

是百年後東家見花歡笑多西家對月鼓缶歌眼看白
髮嘆衣彩不有卮酒奈我何奈我何惟酒可且呼妻子
中堂坐悲自中來酒一杯我不能奉爾奉我

子夜歌

歡去燭未盡知儂有淚不歡來燈又亮但使儂無油

八月三十日東台酣春樓星社小集席上賦贈北

條鷗所

仙道才人豔冠羣懺情欲把戒香熏梅花標格蓮花舌
桃葉歌詞貝葉文璧月樓臺夢相見羅襦鄉澤醉微聞
長安賴有疏狂社紅粉齊回未讓君

吾家詩旨尙清新澹彩濃思筆可勻未敢向人談格調
依然對酒見精神簞紋平貼沄沄水缸面酣生盎盎春
好潑郎君畫眉墨東台山色翠于顰

既望夜坐雨忽然傷心得三絕句

似有人來蟲驟歇絕無書寄雁空聞傷心昨夜長安月
萬戶秋風一片雲

幽人不寐夜燈微竹葉蕭蕭雨打扉茅屋千秋真底事
淒寒滿壁欲吹衣

空階雨絕一蜚孤碎佩叢鈴響有無滴盡斷腸花上淚
燕脂井水也應枯

竹磯幽居聽秋小集席上分韻得送

商飈驟從蘋末送梧桐騷屑芭蕉闕露華吹雨飄亂蟬
竹梢擺影驚栖鳳班姬團扇早見捐卓女綺琴須一弄
如何聽者渾無聲沈思尋入秋花夢

十月三日岡本黃石伊藤聽秋諸老修梁川星巖
先生贈位祭于星岡大來賦古詩一章以志感

丈夫不死婦人手二三弟子泣趨走端坐而逝何從容
緹騎捉人瞰門右幸免清流瓜蔓抄南禪抔土秋蕭蕭
毅魂倘悅朝北闕百年風雨來松梢幾人墓門拜下馬
嘉安間事堪悲咤當時國論徒喧逐詩人乃見籲天者

五噫謾說梁伯鸞先生慟哭誓回瀾祇教賈誼召宣室
不妨李泌是黃冠丹封一夕出大內關左刊章忽鼎沸
煙塵瀕洞白日昏閭闔不開少微墜事難可爲奈爾何
羯胡紛紜惟議和彌留勵色屏妻子遺恨應同呼過河
今皇整頓乾坤廓四海恩霑雨露渥追恤先朝草莽臣
深知向日傾葵藿佐命若遇中興年勳名不讓劉青田
嗟向杜陵稱野老獨留詩卷天地傳王霸夫妻早日意
庾信江關暮年淚馬鬣既完三尺封鳳綸新錫四品位
維冬十月天雨霜辰良日吉星之岡東都詩老遙營奠
猶是梁家一瓣香青衫我亦唱楚些白髮門生共環坐

眼見孝皇宵旰年先生七十不受賀我翁時候先生門
雨衫風笠感師恩老來飄零去掃墓黃葉聲寒酒一尊
卽今風木三年矣九泉把臂合相喜是日鸞鶴同翱翔
白雲容容靈戾止

山縣含雪將軍

有朋椿山莊歌

椿山舊名
乞丐略

山茶谿水鳴琤鏘寒雲棘樹秋蒼蒼昔爲乞丐峪今作
將軍莊將軍昔亦起卒伍啞啞叱咄風雲聚時來指揮
衛霍軍功成密勿伊呂輔侯王將相有種哉同是附鳳
攀龍來今日君恩紀鐘鼎當年此地委蒿萊自從別墅
開綠野松臺竹崦潭影瀉接羅醉插黃花歸行人皆識

山公馬豈無絲竹娛未憶秋風鱸誰謂謝安石老欲栖
西都一丘一壑頗自足何人爲唱椿山曲我來問訊第
五橋笑看庭草隨意綠平生拄笏望嶽雲爲我倒屣情
何殷菲才謬許草堂杜此園寧愧何將軍將軍達而曠
酒酣拓戟怒疏放英雄不作寒乞聲詩人願洗窮愁相
鬚眉軒昂老氣橫哀壑松濤知此情芭蕉庵裏雨數點
蓮花寺中鐘一聲

關澤霞庵卜居向岡招邀同人賦贈

小築幽居面爽岡隱囊紗帽坐焚香半籬竹助梧桐碧
十日花憐蛺蝶黃秋繪故人詩滿壁客呼鄰叟酒過牆

當檐相揖青山影憺對無言到夕陽

送井原天游赴任琉球

薩摩已南莽濤起赤道炎風來萬里諄諄出出硫黃山
黑潮噴射珊瑚紫蟠蟠者何古流蚪三十六島若雁齒
微痕乍認中山螺羅星一盤針所指昔游奇絕不可言
揚舲而下箭同駛淩虛長嘯金鼇高爾時蒼茫觀止矣
安識鬼界非人寰尙疑仙山是海市卽今恍忽夢見之
聞君褰裳浩浩水首里古稱龍宮城魚鱗屋兮繪蛟兕
蛇絃鼉鼓鳴嘈嘈金支翠旗光俶詭一自王化敷蠻陬
漸見移風橘爲枳百年全絕禹域封千秋不廢舜天祀

玉簪爭候使君來踏歌周道平若砥犖确山徑插竹迎
巉巖石壁焚香俟賓筵勸酒香螺杯搖花豔照嬋娟子
綠陰風響榕葉涼紅肌刀劈荔支美此間真樂勝封侯
十斛涼州詎須擬丈夫本色專城居羨君一官竟如此
我也蹶躄空風塵五年前事雲渺瀰畏途觸熱心煩勞
卻似瘴煙毒霧裏臨別杯引滄溟波賴此好奇心不死
高歌欲挽扶桑弓慙愧八郎弦上矢

近藤柳塘

原

疊雲集題辭

戈鋌天地鬪龍蛇永祿元龜似亂麻法性兜鍪鎖蘭若
甲陽軍鑑歎蟲沙遺塵難問茫茫水故壘仍歸陣陣鴉

萬古詞人與憑弔樵蘇泣說武田家

天目山頭陣破時陰風慘澹夜淒其闔門白骨無人拾
市地青燐和雨吹春草萋萋燒不盡水晶瑟瑟采貽誰
後庭多少飄零恨賴爾生花筆一枝

成敗論人事易訛登高應賦百年歌川流挾戟趨科野
嶽勢撐天壓駿河運盡覆巢嗟已矣夜深聞笛恨如何
越山一路英雄末贏得三更過雁多

五十篇詩金石聲擲來驀地使人驚君應範水模山手
我有淩滄搖嶽情卻怪天心空設險動吹鬼氣欲成城
持茲一卷訴眞宰疊障連雲早鏟平

十一月二十七日村上佛山翁十三年忌辰末松

青萍謙澄城井錦原剛諸君設祭筵于紅葉館率賦

七律二章奉奠

雲壑煙巒擁墓門
佛山髻翠自溫存
小橋流水空千歲
故宅詩人別一村
月冷蘿衣挂叢樹
秋荒蕙帳散啼猿
瓣香不斷遺編在
好拜先生未死魂

翁故居人稱爲詩人村旁有橋名千歲又翁第三編有拜詩詞

絳紗弟子涕漣如
往夢追尋感有餘
事太紛紛三月雪
鴻方杳杳一封書
齊名兵火關心客
混迹江湖滿地漁
今我丙廬纔撤後
可堪回首卅年初

元治中先君子寄書于翁乞詩經十有九月而始達蓋爲兵火所阻也

夜觀星象六首

夜觀星象我心忉
爛爛天狼光正高
山澤遺民久嘗膽
萑苻羣盜漸如毛
炎州銅柱薶荒瘴
溟海蘆笙激怒濤
坐使威弧逼窮北
不禁雷吼匣中刀

松杏山河百戰場
謾言王氣在遼陽
謠傳白雁天無悔
史紀紅巾國必亡
若箇杞憂與慷慨
前朝殷鑑大蒼黃
悲笳四起吹胡月
一種青城淚萬行

太息頽瀾不可回
禍妖早伏白蓮胎
百年全墮鴉煙劫
四庫終悲鳳闕灰
武帝旌旗翻廢苑
昭王駿馬哭空臺
支持殘局憑誰力
莫遣長城自壞來

憲皇池館記宸游
腸斷圓明園裏秋
蓬島瑤臺如夢寐

丹書鐵券又邊愁陪都父老悲弓劍回部風煙散馬牛
昔日興龍連朔漠至今無術制諸酋

回首盧龍塞上山居庸險過古函關賀蘭落日蒼茫裏
玄菟齊煙想像間羽翼雲屯八旗衛指揮星拱九州蠻
而今一半誰家土亭埃蕭蕭只自閒

東方時策可堪聞斫地悲歌熱夜雲死未應僵蟲百足
禍成或恐鼎三分華夷謾劃鴻溝別脣齒須防玉石焚
安得手翻銀漢水機槍萬丈掃妖氛

除夕永阪石埭祭詩龕小集作十絕句

娟娟萼綠繪春葩髣髴侍書鬢影斜大有香蘇山館樂

惟君博士是梅花

玉池龕畔玳筵開春在流年將盡杯絳燭迎人星燦燦

梅魂詩魄一時回

珠啼玉笑譜魂銷藥裏書匳詩半瓢擁髻纏絲癡賣盡
歲除端的可憐宵

與君各有故園愁說到流離也淚流昨夜烏啼驚噩夢
綠楊城郭月如鉤

天寒茅屋憶佳人忽對梅花一愴神風雪都門賣珠者
可憐多半是鄉親

塵沙滿鬢愧詩盟恨不風流過一生閭巷新聞花月外

論來事事總關情

太白山人笑擲觴天風海水自浪浪蒼然氣骨凌前輩

此事空同獨擅場

謂國府青厓

竹君神韻抵新城酌綠斟紅熨貼平來日花開鶯滿樹

畫船春水賦清明

謂本田種竹

徵絲撰竹俊游曾又共詩龜此夜鐙欲問吾生何位置
可爲蕩子可爲僧

升平無補悔應遲句不堪傳況祭之笑煞毀譽尙相半

槐南三十以前詩

槐南集卷十三

槐南集卷十四

東京 森大來 公泰

壬辰

元旦醉後次錦山韻以道情

豈有瓊瑤報木桃梅花結屋鐵腸牢誰能遣此年纔改
臣一中之酒亦叨跋扈動招猜忌劇頽唐漸畏姓名高
平頭三十人間世且趁潘郎未二毛

鶯聲花氣一團和春白蓬蓬遠處多寸草心隨馬蹄路
深杯甲蘸麴塵波麗都風月誰推主聖代賢良自異科
爾我別修文苑傳好將翰墨雜笙歌

題故身延法主清兮道人遺集後

先人曾訪大師家講樹煙開曲徑斜詩夢經聲出修竹
禪心月影指梅花谿流曉漱三生石槐火春煎一榻茶
過去因緣今露電零星文字感恆沙

上副島蒼海公兼言余懷二十四韻

磊砢松柏姿神寒骨峻竦厲色排嚴霜動使蕭曹恐曠
代生若人天子獨知重贊勳無闕遺皇圖喜克鞏矢詩
威鳳臻下筆洪濤涌周情與孔思萬古日星拱顧念風
雅衰浮響競濫冗卓犖無曹劉建安且難踵沈痛杜拾
遺飄逸李供奉其外唐詩人大半類寒蜚矧乃今榛蕪

得非吾道壅此事誰提撕後死力慙憑我與二三子過
譽謬延寵謂是龍之媒俶儻渥注種持之獻王廷意態
復森聳豈無豎子名自顧增慙悚文字耽蟲雕生涯甘
桎梏歲晚已崢嶸入春世論詢閉門徒覓句縮似繭中
蛹時抱魚目羞謾疑馬背腫感公不遐棄剖璞示珪琪
莫謂改轍遲願效扶輪勇大雅或可作小才嗟窮蹙狂
簡何其多吾徒慎作俑

鏡中梅和久保湘南

欲成煙霧欲成霞雪阻簾櫳月罩紗似有箇人仍不動
卽知是影任相遮洗鉛何意凭妝盒漱玉無言對井華

更訝窺窗鶯囀曉花非花處豔于花

霧鬢風鬟忽見臨背人還立玉階陰自家翠袖那堪折
時世紅妝不許尋睡起猶疑冰濯魄印來纔證月同心
淺華似水能清淺無奈幽香爾許深

香南雪北記瓊洲強被移栽入畫樓影若不留隨笛散
身原無準和煙浮神君降帳空聞語倩女離魂澹亦愁
誰與樂昌圓好夢忍教破鏡一生休

臨風矮媠上仙鬢倒暎蛾眉繪遠山斜欲抱煙何澹薄
蕭然倚閣尙幽閒桃花人面防崔護楊柳腰身鄙小蠻
只許夢中鶴同照盈盈碧玉自回彎

含章殿裏悄窺春悟後何妨有色因隔幃雲移不知處

一箇月出更無人幾生修得香熏骨阿堵傳來妙入神
莫使壽陽頻擘取怕他眉額帶輕顰

玲瓏四面敞銀屏暗處香搖霧現形的的是花看不錯
眞眞較畫覺逾靈幾家霜角曾吹曉此夜瑤臺正聚星
恐被釵頭么鳳喚參橫斗轉峭魂醒

空際仙根不易栽羅帷夜半有誰開神光縹緲鏡離合
香色模糊雪去來世外佳人蟬脫殼定中禪侶鏡非臺
一聲清磬發深省羞照詩脾萬古埃

奉和春畝相國

聞說東君信不違梅花如雪點瑤扉風和旋喜南枝暖
霰集會憂百卉腓春水白鷗鄰別墅宮袍采石隱魚磯
稻梁深愧官池雁夢向滄浪閣下飛

滄浪閣卽興呈春畝相國是日雪

滄浪夢寐久相違今喜漁歌和到扉坐有春風如此煦
庭中陽卉未曾腓三年皮骨奔塵土二月雲濤激海磯
提挈不知蓑袂冷江山滿眼雪紛飛

野口寧齋唐宋皆詩閣小集次主人韻

主客圖中物冥搜此草堂風謠非一骨源委泝三唐不
有詩題壁寧容酒滿觴小梅花獨笑我欲乞餘香

才捷滾珠盤韻艱排梗壅名高洛下機賦豔牆東宋風
月任情鍾濤波驚吻縱獲斯賢主人把臂喜相共

春風吹玉樹仙子下瑤階報道王喬到驚看衛玠皆劃

壁翠鬢唱隔花黃鳥啾東君眞絕世鸞偶幾時諧

金荃與蘭畹文彩錦離離徐庾古之豔秦黃眞我師宮

商絃外韻石闕口中碑隱語無人識除非鸚鵡知

毫素託深心塵談藏妙謔竹梧風韻楹琴硯月臨閣淵

雅任參軍雍容劉孝綽淫哇正競興憑爾警霜柝

杉田觀梅十絕句

煙艇橫塘波作鱗苔枝雪蕊可憐春推篷先破青山笑

同調無非澹宕人

翠竹漁扉趁曉開
蘭橈宛轉水滌洄
替花多謝煙波主

載得應劉七子來

此游與錦山齋齋庵庵湖南竹磯聽劍先至橫濱高田梅南艤舟而竣款待備至

作意嬉春風日恬
半篙漲碧不教添
流鶯聲裏舟過去
兩岸晴樓齊卷簾

梅花香海白雲通
取次滄洲指顧空
款款人行畫圖裏
青山匝巾錦屏風

荀輿奉母樂融融
况與青谿蔣妹同
略怯梅花清淺水

翩然羅襪又驚鴻

竹磯伴其母妹水淺舟不到岸各寒裳而渡

意氣元龍百尺樓
一瓢有酒傲王侯
看花詎敢居人後

平日詩名在上頭

戲錦山

萬梅花處雪猶殘
水國峭風生晚寒
一任漁翁吹鐵笛
老枝皆作海龍蟠

燕脂幾點澹精藍
妙法寺梅嬌不堪
只好杏花村店酒
當壚一笑較春酣

竹外茶煙花下關
一聲清磬似空山
始知雪盃冰甌味
也在尋常籬落間

載酒江湖興偶然
彎環山色碧於煙
異時同入梅花譜
一舸詩人二月天

千芳樓邂逅
迂澤菖水
酒綠燈紅歡飲達
日用

錦山韻賦謝

菖蒲才子畫橋頭挽住五雲深處舟歌妓品題如拱壁
詩人名姓抵封侯客歸似識來朝雨我醉不知何處樓
擁髻鏡前夢微醒側聽琴筑繞檐流

和山田空齋伯

順義韻

共楫前程何處求濟川回首事悠悠江南煙雨春潮廣
漁父收帆滯碧洲

揉香賊

驀來者何手掣電非蘇合彈非冷箭練光一道飛未飛
美人頰裂血如線蛾眉于爾知何仇毒手紅顏一旦休

豈有冶容誨淫罪可憐弱息懷璧憂若論匕首真不測
古之荆軻有慙色不解焚琴煮鶴心甘爲碎玉揉香賊
洛陽女兒晝不行煙雨空濛春滿城冷坊幽市忽人影
鬼車啼作摧花聲

四月二十四日與巖谿裳川

晉

野口寧齋同展先

大人墓

與君同酌夕陽來野水無聲冷古苔吹散一團蝴蝶影
落花紛似紙錢灰

送寧齋游名古屋

廿餘年夢走天涯明發聞君客興賒一夜同傾一尊酒

故人去看故鄉花關河遠樹平如薺城郭殘陽半帶鴉
劫後新煙寒食路不知燕子入誰家

三十頭顱忽已遲可憐名姓老京師聞言故國鶯花麗
翻憶當年竹馬嬉畫舫權歌春水緩麗譙雲樹夕陽移
分明夢上清明冢餞爾棠梨雨冷時

五月一日星社小集次壁間所揭星巖先生詩韻
自入嬉春夢今晨始在家開門迎客款移石任苔斜萬
綠漸如水牡丹纔一花晚唐風味在吟賞殿韶華

巽亭小集用吳梅村舟行人影動爲韻送福原周
峰歸伊勢兼寄高野竹隱

清雄

眠琴小榭臨中流下有荇葉蒲芽抽綠波雙槳鴨頭劃
紅簾一桁蝦鬚鉤花夢惺忪幾曾醒酒鱗激灑不可收
別情詎須較深淺春水穩送沙棠舟

青蓮歸興浚滄瀛竭來醉徧長安城春風不斷酒消息
酥雨深知花性情盛唐樂府擅佳麗牡丹時節歌清平
橫江美人遲君久肯道風波不可行

中洲餞君墨水濱枕流三面花一鄰嬋娟衫薄透紅杏
澹沲風柔吹綠蘋一派仙音送簫鼓兩行鬢影延主賓
家家倚闌共翹首如此清歌如此人

歡場少小思馳騁題徧江南好風景畫壁欲爭之渙詞

散花忽悟維摩境偶聽細管度新腔翻覺微波生古井
一往深情戒不成詩魂拚趁燕鶯影

春風已作鶯花俑生是人間有情種此時不賦麗人行
如卮沒當笛無孔紅牙小拍耽填詞故人才調久知重
何當同醉雪香亭醪醖一簾月搖動

立夏後三日竹溪幽居小集席上分韻得寒

百花落後欲無歡毘毘心情索解難惟此清愁憑酒祓
夕陽新綠又微寒

園中卉木盡情看春意仍紅是木蘭底事迷離蟾兔影
繡毬花上獨團團

田邊碧堂手島秋水二君燕寓雅集同杉谿六

橋言長宗星石長望兩公子并星社諸友分陸放翁一

簾疏雨琴書潤滿架清風枕簟涼爲韻得一字賦

五言短古紀事

簾陰新雨晴樹罅夕陽出苔井綠逾添燕泥紅已畢竹
聲履綦集清風吹滿室揮霍從笑談觀諸俱促膝廚譜
傳南京櫻筍鄉味溢停杯且商酌詩思抽乙乙當代論
雋才公等居其一聰明冰雪容磊砢霜松質嗟余才日
減夢奪江郎筆情悟禪榻煙豔愧玉谿瑟被酒酣已往
舊態喜未失無物酬主賢惟此醉橫逸

呈蒼海伯

我希梁伯鸞誓不依人熱健者惟有公把臂恕契闊赤
奮司炎陽披襟若冰雪誰謂大臣貧轉嗟吾宦拙漢家
無闕遺何必五噫切惟此藜藿心同效松柏節

送碧堂歸備中次其留別原韻二首

客有王孫感薜蘿罷俊游谿山澹含意煙水遠工愁燕

寓此焉別雨鐙他自秋西風滿墟樹蘭澤重尋幽

豫訂今秋再游之約

故云

京國聽鶻語江鄉趁雁程柳關長短恨詩有別離聲梅
雨淙淙極秧田泱泱平野望心斷絕水草綠連城

寧齋嘯樓分韻體限五古

風雨而高歌如有鬼神據城市非隱淪豈借江山助一
嘯猿鶴驚再嘯鸞鳳翥三嘯星亂飛四嘯中鐘鏗險韻
賦移居艱如過澶頰同人皆氣沮小樓醉箕踞催我頻
摩箋無詩不容去敢謂渥洼駒王良方可馭鹽車幾曾
困疏才望見恕阮籍亦低首蘇門長嘯處

玉河夜汎志憶

身世茫茫明月圓香魚此夕上盤鮮谿流一道碧於玉
不泝藍河二十年

信陽林希心華甲壽言唐陽囑

華宇春風蘸甲卮鷺湖山下稻肥時剛回六十年來夢
且把黃梁再一炊

七月十五日雷落晚晴閣賦短古紀事呈黃石翁

圯上老人黃石公天邊豎子江赫冲

雷名見道經

有何瓜葛忽

相問奇事明日諠都中記得其時雨脚急天鼓隆隆雲
四集先生正讀杜陵詩得非蒲城鬼神入俄頃晦冥不
見天白羽大箭來闐闐礮然下擊列缺閃地軸震盪疑
盤旋目睽睽者繞梁走厨中瓦釜為鳴吼先生憐渠不
知禮門下收入子房後陰符當日召風雷詩名今日天
下推誰知兜率奉歌誦畢竟雷公亦異才

酉陽雜俎雷聲兜率天作歌誦音

自

茲更進先生履貌是阿香一女子從前悔學博浪椎未
免大聲驚里耳且與先生侑壽觴雨收雲散天色蒼信
是人間晚晴閣碧紗如夢夕陽涼

大洗海樓卽事用黃仲則觀潮行韻似寧齋

其前

昂排山嶽低丘陵白風惡浪俄然興其初墨雲若奔馬
自天盡頭旋軼騰眼看雨脚之攸居十萬八千里亦隘
川后驅來潏潏中波臣飛出鴻濛外颯沓似有鼉鼉號
礮礮母乃坤輿搖危樓與爾嘯而立卻恐濤痕衫未消
潮頭礮石渦旋入雨勢驀空追趕及祖龍驚魂不再回

靈胥怒髮至今溼君言此景不負儂誰敢震懾同兒童
罔象閃屍膽逾壯可知筆有駭電鋒我亦披襟笑相戲
盪胸奇氣難回避豈讓當年蠡勾亭漁洋昆仲觀濤地
等是不可無詩時冥冥天意聖得知故遣吾儕擅奇譎
雨工風師來助之

其後

晚然湘竹舟一葉似不曾知海之立蓑袂飄然吹笛來
鯨鱗聚處挺又入貫柳維鯁槳暫停沙頭漁童拍手迎
可憐魚龍叵變化戢戢空成風雨聲風收雨歇潮亦折
溼雲穿透一聲鐵鬚眉色動神汪洋擊鮮痛飲膾飛雪

興酣倚闌望轉遙只待明月當頭高水精宮闕忽破碎
會見萬頃金波搖豈圖海天黯已暮森茫不辨月生處
空華虛想蜃樓臺餘濤猶颯蚪松樹停杯忽忽如有愁
蹉跎未悟吾生浮已看驚浪卷渤澥又思華月臨蒼洲
明朝臨去重歎息古來雙美難并得不知今夜月如何
陰霞歛破熹微色

哭堀古鼠

故人黃壤夜漫漫贏得山陽一笛寒嗚咽荒菴吟瓦豆
淒涼苦月照桐棺記君軀瘦精神健底事才高性命難
不恨見遲嗟別速臨風我淚灑洸瀾

卽興十律似星社諸子

西風一夕響颼颼木葉林阜霜漸稠每使騷人傷佗僚
誰當陰雨想綢繆敦槃京國尋佳會星宿天官動素秋
菊秀蘭芳行擷取英才也合網羅求

不薄今人愛古人斯言曾服杜陵眞平生矧未如胡越
一席奚妨作主賓風雅挖揚關氣運文章劇切見疵醇
唱酬各抱千秋志始覺高歌有鬼神

建安坐嘯自風生不廢六朝而後情硯匣瑠璃寫宮體
豆花蟋蟀繪籬聲三唐氣調能諧婉老杜波瀾獨老成
此事全關天分厚興來神會便縱橫

摩詰詩中畫亦禪宮槐葉墜碧池煙高岑逸響眞超絕
韋柳沖襟祇澹然朗若芙蓉照秋水迴乎鸞鶴韻瑤天
羌無故實傳三昧纔信琴心不在絃

奇想多從天際尋眼前淺語亦情深不知元白張王體
純是溫柔敦厚心錦瑟義山人索解玉樓長吉鬼同吟
別才更變離騷格雲雨荒唐淚滿襟

硬語盤空說退之力能排鼻筆支持同時鑄出閩仙佛
他日流爲永叔詩戟口文章驚險奧撐腸書卷扶幽奇
精光奕奕逼牛斗想見南荒披髮時

玉局髯仙曠世才華嚴法界涌樓臺投荒未換春婆夢

識字何關時宰猜人去黃樓浪淘盡月明赤壁鵲飛來
豫章自道如曹鄩宗派江西且謾開

遺山健筆壓金元多見中州正氣存異土臣餘蟻蝨淚
前朝帝是杜鵑魂敢同遺臭趙承旨終恥代興虞道園
野史亭邊無限恨絳雲蒙叟莫俱論

何李登壇顧眄雄凌人意氣互牢籠便貽優孟衣冠笑
豈屑蘭苕翡翠工歷下太倉空虎視隆慶萬曆只雷同
效尤今日嗟榛穢別戶分門論未公

如林才雋笑相逢燭跋論詩快吐胸凡此數言非點鬼
願隨諸子學屠龍蕭蕭風雨欣良晤落落晨星認衆宗

漆黑前程須努力同聽霜夜一聲鐘

送北條鷗所歸任仙臺

人生那似酒杯寬迹易成萍是薄官仙夢有臺行暮雨
松風吹鳥入秋瀾終年光景留連足小伎文章遇合難
何日隨君觀海去銀濤白馬竝鑣看

感述二章

少昊行秋挹迅颿天高葉下氣蕭條六軍皆虎山川壯
兩院如龍車馬驕議政廳開期不遠閱兵駕幸路還遙
吾皇自是憂勞切白露蒼蒼流九霄

臣子何人不涕零可歎世事日冥冥黨朋周比排牛李

清濁同流混渭涇月日公評誇我確詩歌惠贈乞君靈
立錐文苑菟裘在遮莫蜚吟喧戶庭

聽雨

聽雨冥冥萬感生十年心事一鐙檠詩人秋鬢蕭騷甚
不住芭蕉葉上聲

盆蘭

幽蘭采采莫傷根一任移栽白玉盆終古馨香當自發
不關服媚在朱門

秋日詠史

漢家諸將唱刀環天子新從閱武還星斗夜垂蒲類海

鼓笳秋競賀蘭山征旗獵獵三邊肅鳴馬蕭蕭六轡閒
塞北浮雲風色動白河當是白榆關

昆明習戰朔風號直自窮邊入古毛百道火牛僂騎突
八公草木短兵鏖應機變化排奇陣奪彩功名賜錦袍
醜罷鏡歌笑回首鬼奴川北亂雲高

秋風雁影又橫汾殘角譙門落日曛花萼諸王齊拄笏
虎賁中將共論動車穿太液池邊柳鞭度新豐樹裏雲
執戟未應叨獻賦承平盛事喜頻聞

漢廷枚卜費都兪麟閣重開舊畫圖諸相偉動真赫奕
老臣小事任糊塗密雲不雨天闔闔多士如林殿陛趨

自是聖皇依託重莫教碁局賭贏輸

佐命勳臣附鳳多可憐黨錮久操戈紛紜白簡從誰適
歷亂黃絲奈爾何典午公私喧鼓吹甘陵南北入謠歌
銜杯樂聖誰家事可使冥鴻避弋羅

十一月十一日紀事

嗷嗷哀雁哭霜風天奪中興郭代公銅像淚痕明月冷
銀山魂氣夕陽空九重城闕夜傳鼓百戰關河秋落楓
雲閉闔閭星象惡至尊震悼念元功

十六日同野口寧齋奉唁蒼海公居喪率次重九
原韻以呈是日子三十初度之辰距先君子四周

諱日前四日耳

撒瑟嗟風木丙廬嗔夕陽果盤分御賜燭火動靈牀維
我降生日言趨君子旁莫傷哀毀體罔極對穹蒼

二十日尾州故舊設先大人齋筵於名古屋金城
館大來百里奔祭恭賦五言古風六篇以告

自我淚枯後歲月倏四周風木復蕭瑟滿眼霜葉秋白
雲飛隴首宿草生阿丘不知泉壤間皓髮還幾抽而兒
三十矣惻怛徒百憂計拙蘋蘩虧罪重聲名浮一官未
能棄動遭衆口咻遺篇一萬首付汝能刊不屬續言在
耳捫心安可度奔波任潦倒芒背多悔尤恥竟貽瓶罌

業轉嗟箕裘撤廬月直入白楊鳴颺颺忽聽故林烏啞啞
啞啼松楸諒我反哺意罔極難爲酬慟絕勿復道明發
重夷猶

夷猶上車去腸作車輪轉晨笳四五動霜風何翦翦豈
不開噎鬱原陸渺平行人煙生海壖稻雲彌睜眦天高
行樹疏仙掌嶽蓮展旋復隱不見颿輪飛電卷忽焉當
我前白雲冒晴巘回顧心茫然始覺征途緬左望函谷
關木末挂虹棧亂雲若槍馬先考昔策蹇其日風蕭蕭
墜葉雨衫法想見荆榛中蹴躡足亦繭追往肝腸摧山
川淚目潛哀哀伏車箱餘象不復辨嶽麓邈迤回夕陽

下駿遠

駿遠青不了雲樹連陂陀崎嶇鬱谷嶺蜿蜒天龍河斜
景仍澹澗霞逗濱湖波松濤若鼓瑟涌翠搖峰螺聞當
風雨夜海水陷作渦沙鹵屢已變陵谷常苦多人事毋
乃是爲時曾幾何浮生等轉燭卽今廢蓼莪此海何當
乾此恨何當磨心驚朝露速眼看西日趨車影不少住
奄忽追羲和參尾自茲入鄉語聽非訛何以見父老彈
鋏慙鳴珂何以薦蘋藻涕泗空滂沱鴉啼熱田廟喬木
森嵯峨

嵯峨綠楊城隍曉雙魚闕夢寐常見之卻來神悅忽出

車悵四顧曠黑迷林樾親故張燈迎攜手敘契闊延我
卸行裝觸目驚慘烈人家半欹斜往往壁龜裂因念去
年冬奇變何倉卒厄丁百六會天地猛摧折公等過來
人眼前浩劫閱桑三舊門牌料知亦顛蹶生逢雜悲喜
舊識嗟存歿新知爲慰藉翦燭重相說近創柳城社稍
稍集才傑往事那須論先人瓣香燕筐啓遺墨書南無
賈島佛

島佛供當中四壁羅雲煙焚香篆鬱結蝴蝶花冷然遺
容儼猶在含笑臨法筵青山啓蕙帳絳節邀雲駢嗚乎
布衣尊盛名七十年萬里白鷗意五湖春水前放浪興

會屬麗則詩教宣壇坵望狎主嘯傲凌飛仙斯道關榛
莽旨託滄浪禪冥沖契神韻空靈謝言詮風化所動感
轉在無聲絃循循惠來學得魚乃忘筌殘膏與賸馥霑
漑長絲絲卽此營奠者無非文字緣肅拜重哽咽予懷
傷逝川

逝川何滔滔陟岵卽修路一曲思悲翁淚灑故園樹爲
我修清醮爲我致款遇兩世欣古情信宿偕良晤茲地
鍾毓靈人豪見天賦牛背出英雄滿村夕陽處霸略說
中興流傳有佳句詩道此焉作亦知關氣數先志誓紹
繼願仗諸君助大雅俱扶輪微名喜驥附刺刺情靡窮

明掃先妣墓圓頓寺裏鐘迢迢隔野渡林巒生驟寒城郭入霏霧青楓歌大招銜碑復孺慕親朋從此辭歔歔不能去

邯鄲才人嫁爲廝養卒婦

蛾眉入宮妬才人出宮悲悲莫悲兮嫁廝養如花顏色爲阿誰趙王宮裏烏啼夜露井么桃紅未謝承恩宛轉進銀環不知蚪漏沈沈下抱衾來日癡若雲含羞偷理繡袂裙匡牀在下芄蕪蔽儀態萬方持奉君君恩無轉移妾顏亦已故齊紈新裂動君懷誰復將縑來比素素女空橫陳廝養動見瞋色笑亦云苦既託百年身君不

見區區私愛難可保才人零落邯鄲道有人他日覓封侯黃梁炊運夢醒早

湖心亭小集送周峰南歸

湖心亭子十年情何以送君明月生一笑諸公吟思苦江南煙寺又鐘聲

淨琉璃史題辭

百恨三條絃上生何論趙瑟與秦箏皮簧熱迸傾盆淚牙撥哀傳裂帛聲傀儡偏牽絲豈兒戲詩詞移俗本人情淵源同在溫敦旨愧我風騷學未成

雞林詩選題辭寧齋囑

王風蔓草淚同霑箕子山川日逼崦三百周詩刪述後
何人采到麥漸漸

依稀記得宋熙寧雅樂雖亡有典型好與雞林補詩史
千秋當廢舊圖經

楊花渡口暮雲斑澹宕春風鴨綠間八道歌謠自盈耳
可教姓字擅香山

由來外國傳多訛况復聲詩煙滅多長記名臣辭義正
首陽仍責采薇歌

澹雲微雨小姑祠謾道高麗絕妙辭定與漁洋翻舊案
集中半是性靈詩

乾嘉詩格漸頹殘淪到咸同不耐觀似此中原無愧否
遼東屬國舊衣冠

樓船破浪古登萊曾帶扶桑日影來悔不珊瑚收鐵網
碧雲暮合永嘉臺

我歌君舞一尊空鐙下烏闌鈔未終搜到三韓緣底事
且將殘瀝酌豐公

和蒼海公送窮詩

諫草焚殘世莫聞只傳典麗喬皇文塵緣詩外難爲聖
仙夢雲中尙有君碧篆丹書騰逸藻幽蘭白雪散淒君
窮陰笑送佺佺鬼梅萼青回已二分

除夕玉池祭詩龕觀蘇齋圖引

古來神物遇合殊延津雙劍龍騰趨有緣千里會相見

玉池乃獲蘇齋圖覃谿於蘇有心得況兼施顧註本俱

名齋仍沿蔣詡徑先是蔣樹存藏蘇書使王麓亭作蘇齋圖蘇齋之日防此更顏其室曰寶蘇風

水題名繼居易烏雲真帖傳君謨蘇齋藏水洞題名拓本又有天際鳥真帖即東坡所書蔡君謨句也凡

其碑版其墨蹟一一什襲同珍珠年延同人作生日誰

常從者樂蓮裳與吳蘭雪就中吳也稱得髓蓮花博士華而

腹七分珠光豔于月侍書媚嫵蘭芬敷玉池標格略相

似情性合不差鎔銖香蘇寶蘇香一瓣詩禪畫禪酒百

壺中山遠致綠姬畫鈴尾霞奪紅珊瑚蘭雪姬人綠春畫蘭小幅石塊曾得之琉球友

朋傳觀詫奇事豈料此卷雞林輸此圖乃購自朝鮮聞言金家賢父

子乞靈海外相傳摹試按當時唱酬什分明軼事如合

符圖蓋為朝鮮金西堂秋史父子作者參觀復初齋香蘇山館諸集皆歷歷可徵詩龕今夕配饗祭燈火粲粲搖

繼毵恍疑蘇齋文字會北平覃谿東鄉蘭雪來晏娛又將絲

竹壓臘尾簾帷彷彿鬢影姝興酣嚼墨噴四壁幻出梅

花三百株雪痕醉氣月浮動一線春脈香模糊即與二

物成三絕似此風流古亦無嗚乎似此風流古亦無何

不補畫筵展錢塘湖

槐南集卷十四

槐南集卷十五

癸巳

東京 森大來 公泰

歲朝隨春畝相公游大磯率賦以呈

嶽色崢嶸湘水湄
霽顏似訂隔年期
忘機鷗鷺如人狎
有脚陽春載酒隨
相國心應存魏闕
至尊恩自及瘡痍
煙波駘蕩謳歌好
灑灑梅花動玉卮

又用錦山韻

錦石淘綾灣又灣
層巒含笑露孱顏
蘭舟香盪尋春櫂
鷗浪青分倒景山
啼鳥緬懷高衲韻
繁絲仍唱麗姬嫺

俊游無限滄洲興恍向蓬萊綴舊班

人日陽和洞卽事似錦山

語笑梅花香一羣孽環結佩坐春雲滄波人日含新碧
壺嶠仙鬢散絳氛樹杪晴帆十洲盡潮頭信雁九霄聞
聯襟深喜隨陽伴隔宿醪酥不斷醺

橋本國手

剛帝

含雪樓用長三洲

茂

留題韻

拍拍春潮漲綠汀松風拂面酒微醒樓含嶽雪生虛白
海引岑嵐入遠青鬚沸泉清滋藥草毯繆鶴暖養仙齡
客來不盡巡檐興爲報南枝笑驛亭

鷗盟館次錦山題壁詩韻時中并櫻洲

弘

高島吞

象亦在坐句中故及

步履尋香又一年無邊芳草綠波前栽花舊令談非俗
讀易高人韻欲仙霞日妍光憐細膩鶯春麗句愛芊眠
相思寄在木蘭權同醉桃根桃葉船

海上春興用副島樞密韻遙寄

高臺曉晞髮烹日媚芳洲霞曠參差出煙槎容與浮三
山誰覓藥萬里此馴鷗泉石膏盲久春回喜早瘳

大磯嬉春詞

凌虛樓閣是招仙羸女吹簫分外妍春在乘鸞煙霧裏
蕭郎花下送鞦韆

春早數峰搖翠霏漁家三日掩閒扉一帆不見滄浪闊
潮去潮來大小磯
延臺寺裏粥魚遲漸是鶯啼草長時第一東風裙帶綠
頭香先進虎姬祠
十郎昔日鐵心腸一片柔情也不妨豔魄梅花同倚石
春風俠骨至今香
花水橋邊正落潮高麗山下會相邀聞鸚俊侶黃柑酒
拾翠佳人綠鬢翹
渺渺平沙瀾瀾波白于團雪碧于羅漿枝穩載春消息
花影漁娃鬢畔多

當壚商女綽多姿笑道風光宜水嬉爲是春潮來有信
洗妝要嫁弄潮兒

誰知煙水是平康七百年前歌舞場今日繁華都換地
青山半屬貴人莊

玉笥山光黛碧勻芙蓉冠帔白嶙峋鏡中相對蓬瀛水
六博仙人笑賭春

縹緲神山潑勃煙洞分林屋作平泉笑看下界松濤吼
人坐陽和第一天

十一日游小田原滄浪閣時內旨以閣假充常宮
周宮兩內親王殿下別館修築竣功行啓在卽恭

賦此紀事

翠館新開綠野堂晴洲花草自芬芳蘭槽泉帶驪山煖
鈿轂春回沁水香同氣天潢兩公主一家瀛海舊滄浪
輕舟葉葉鷗來去爭逐娥英降碧湘

野口寧齋三體詩評釋刻成索予題辭謾作四絕
句應之

才情雙絕抵清新中晚唐詩最可人宛是江南好風景
落花片片媚濃春
汝陽選法未荒唐一字精微細酌量不解當年虛谷叟
野人門外說冠裳

笑煞操戈物茂卿謾言周弼是無名如何苦奉坊間刻
轉被滄溟誤一生

今人格調節麤才吾愛寧齋有別裁但是江湖蕪穢甚
會心文字付誰來

古曆重三汪芝房星使風藻紅葉館禊醮率賦四章
以言我懷

觴詠神山曠代無霓旌絳旆集蓬壺深知潭水桃花意
重補乘風破浪圖汪梅庵使琉球時所作芝浦紅霞春散綺禊堂銀燭
夜流珠履綦盡是瀛洲選也許王喬笑躡鳧

舉杜風流步履輕采詩盈袖韻鏘錚畫闌曲比蘭亭水

妍唱圓于茂苑鶯紅粉齊回新節使晚櫻酣近古清明
平原十日須留飲釧動花飛總有情

憶昔花開廿四番同將芍藥贈嬋媛流觴故事家家酒
繪水新聲在在園絕代銷魂關冶習三春疊唱倒詞源
而今望斷蘇門嘯碧海珠沈何忍言謂孫君異
芳尊不御謾躑躅怙悵須防相見初拓戟狂陪修禊醮
閉門笑謝絕交書仍憐孫楚才真異且恕嵇康嬾有餘
若道轉喉多觸諱詩人未合廁簪裾

送寧齋西游次其留別韻

平生歡聚綠尊前小別誰知是偶然舊雨不來芳草暮

春風又到落花天關河柳色三千里驛路鶯聲二十年
匹馬未曾離夢寐如今終讓祖生鞭

平安自是綺羅城流水鈿車不斷聲祇樹千林翠微合
鴨河一桁綠痕明可憐嬌鳥來相喚無數紅妝早識名
小住知君愁太甚銀箏隊裏拾簪行

馬首雲巒笑破顏回頭帆影笛聲間春辭洛下鶯花寺
暮話江南煙雨山五月風光正沖澹三君巾履共蕭閒
謂碧堂秋水綠陰便好聽鷓鴣恐爾留連不敢還

與裳川霞庵展先大人墓裳川有詩卽次其韻

滿眼青山綠樹新一鵲啼過感前塵棠梨乍散寺門路

蝴蝶如招壚畔人宿草碑陰空酌酒白頭地下亦傷春
粥魚聲裏斜陽轉欲去無言攷淚頻

石埭招飲巽亭賦此以謝用楊鐵崖花游曲韻鐵
崖賦此曲時與張雨顧瑛兩名士偕而是日會者
恰又三人錦山逸態固不讓茅山老仙石埭風流
宛然玉山再世獨予詩笨拙有玷老鐵多矣是爲
歉已

雨簾煙意青濛濛柳絲吹溼平橋風春歸山在鶻聲裏
萋迷芳草蔚藍水菖蒲花發薛濤門風光碗晚過前裙
且汎觥船看妍步不須去酌劉伶墓玉池狂興側帽來

相約偕飲金蓮杯筆牀茶竈兼茗盃一一提攜叩白板
迷樓醉忘花東西只記壁有紗籠題殿春願作采芳使
長趁蝶蜂鶯燕四衍波更借他家箋與寫水閣瀟瀟篇

其二

酒酣以往江冥濛琴筑和雨歌臨風夜篷燈火有無裏
三叉平添一篙水不知舟繫誰家門此鄉未合離釵裙
聞言羅韞淩波步中流便是宓妃墓驚鴻髣髴潮去來
何如且覆生前杯進銀鑿落金縷盃和青玉笛紅牙板
更欲一舸人姓西澹妝濃抹隨意題船山舊句亦驅使
百年消盡春愁四新詞狎客笑擘箋古歡同續霓裳篇

壁揭張問陶詩幅是石埭珍製有一曲霓裳接古散之句末段故云

席上戲賦一絕

棗花簾子雨微寒一曲清歌正倚闌
我有相思無唱處桃根桃葉畫中看

巽亭本事詩六首

戲錦山用席上原韻

詞人品第重旗亭可可妙髮來倚櫺簾
漾綠波吹酒影花留紅藥繪春型
三巡有意遲酬罍十索無言笑指瓶
羨煞淳于褊解後眉峰細檢一分青

疊韻

壺觴還下水邊亭濺濺簾波盪畫櫺
熨綠貼紅成故事麗酬妍唱見新型
生香墨沁雙脂盞不語花憐小膽瓶
卻憶當年權歌發春潮鬢影一般青

石埭往年有依稀鬢影落春潮句傳誦一時故云

再疊韻

本事銷魂說巽亭玉山頽倚杏紗櫺
幾將冰瑄修鴛牒可使黃金鑄佛型
色相參來擁螺髻錦纏拋盡挈銀瓶
豪懷愧我比前減與子枉同袍袖青

贈石埭用船山詩幅韻

名騁春城走馬韓笛廊箏榭記前歡
廿年香夢銷魂極一字詩情沁骨難
醉召鶯花供藥籠笑呼屈宋作衙官

鬢絲仍似章臺柳豪態何須照水看

疊韻答錦山

金門詩筆壓黃韓況有鄰牆過酒歡訂此蘭交臭相合
恕吾薑性粹應難花間同聘彈箏妓松下常嗤喝道官
滿眼庸流誰識得狂蹤儘作布衣看

再疊韻

神仙標格想依韓寫韻何人相得歡悟徹天衣無縫妙
繪來春水有聲難情憐桃葉濃于酒味愛梅花冷似官
後夜笛聲飄欲舉前身只許月中看

星岡茶寮小集次韻贈仙臺佐伯羽北

真滿

夢裏滄洲縹緲天平生蠟屐恨無緣英詞雨集先賢在
本事風流吾輩傳今日乍逢同調士與君願署一臺仙
涼颺髣作松濤想清簟疏簾對碧川

送落合東郭歸里用其留別韻

芙蓉紅淚透冰綃似恨藍橋天外遙明月簾櫳涼正動
微雲河漢澹將消乍聞雁語歸秋浦料識漁歌答暮潮
無限水長山遠意白蘋香裏笛聲飄
美人香草步相隨裙屐風流誰是師春月喬姿柳依約
夏天何貌粉淋漓祖筵舊雨交情重樂府新婚別味知
此去聊酬錢卜意十千爲爾貫蘭卮

琪樹吹涼到句邊同人餞帳集堪編詩痕漢上客襟酒
帆影鎮西鷗背煙山水淑靈君乃出星辰離合我猶憐
臨岐起望天河處木末流雲碧似泉

東野先生遺愛存松風謖謖獨招魂篋中遺草留黃閣
笏外青山憶故園哀樂中年借絲竹鶯花當日似嬾媛
庭階蘭玉今蕭索贏得烏衣有淚痕

題戶倉梅室 稔 辛壬小詩

養老山巔多白雲危樓百尺嘯聲聞期君詩眼自茲大
天地靈鍾磅礴文

微吟拍徧曲闌干檐角涼鐙箇箇團清峭詩思秋滿地

豆籬絡緯絢絲寒

嘯樓清集分韻得齊

自君之出夕陽迷千里春鶯作意啼人面桃花紅灼灼
王孫芳草碧萋萋歸來尙護名姬照到處爭籠才士題
羸得裙邊釵角句爲儂吟破嘯樓西

八月濃州大水接國島委叔書慘然作此歌

雷碾者何忽呼淘金華山脚夜搖動羣流蒼匄來襄陵
浪頭百尺屋梁涌千村萬落波底趨禾黍漂沒如菰蘆
雖有神禹成何濟雖有鄭俠誰能圖金隄四潰勢奔決
闔郡昏墊蒼黎絕生而流者抱兒啼浮屍游魂慘嗚咽

濃之黔首知何殃天舉厥土還洪荒前年大地賊震坼
是日賸戶嗟流亡傷心三十六灣水飢鴉晚噪無煙里
誰使烏鬼銜香魚可憐魚腹半人鬼繫我京國方悲秋
哀鴻滿耳多殷憂急信鄉親書一紙昔日茅廬無恙不
回音到手倍悽悵只云出門便無際極目茫茫水亂流
牆頭有箇野舟繫

星社大會謝席上諸賓五首

一年黃葉徧林扉隴首蕭蕭雲四飛鐘鼎煙霞來載酒
茶寮禪榻共忘機也知是夜星躔合便補中秋月色稀
忽地山風吹桂發天香縹緲襲人衣

敦槃重此會高秋醉後狂歌未可休願與熙朝播風雅
敢將小伎傲王侯驥騏驎落皆君馭紳笏雍容豈我儔
吉甫清風接輿鳳惟知斯道定溫柔

風度神仙動上台鬚眉朗照四筵來雲霄萬古鳳毛耀
雅頌千篇鴻筆裁

是日簡芥梅先生講其枉臨

北海酒尊常滿坐西園公子

劇憐才

陶庵通侯亦蒙夙允

恨無南國佳人侍上壽聯翩笑侑杯

芭蕉庵古雨淙淙轉見英雄情所鍾

青山將軍

半屋沈煙縈異

篆一山秋夢話同宗

夢山樞密與將軍同姓

吾家兩世感青顧此日聯

吟披素胸興到不禁狂起舞鐙前萍劍淬芙蓉

謂未松青萍

似儻風流才絕倫數奇身世見天真忽然向秀笛中恨

曾是黃公壚下人

昨晚光妙寺水寶猶記前年此筵始與君相見今歸道山那堪收涕

紅友論心同把臂

綠陰如夢暗傷神

水寶根岸寓居

去年此會歡殊甚秉燭何堪

涕淚新

又告社中諸雋五首

漢謠魏什邈焉微大雅遺音誰嗣徽諸格于唐初具體
閒情自創盡無譏流爲葩豔吾何忌吐到蘭芬世所希
只恨工夫欠沈著唾霏未信是珠璣
駸駸絕足見驂騑深喜中興文物優誰道一堂貪哺啜
只防同室起戈矛標新有準齊趨雅伐異何心動效尤
此後聯鑣誓持久精明旗幟冠蜻洲

緩園昔日坵壇開虎嘯龍吟各挺材積弊何關歸未派
偉功須重闢荒萊矧今公道羣疑息轉益多師衆妙該
中有江河流不廢文章雲漢自昭回

江湖創社託高蹤打破滄溟門限重變調多君鳴木鐸
破聲舉世聽霜鐘文星卻占閒分野詩國終甘小附庸
敢向前賢妄嗤點無如俗耳喜寒螿

一席賡酬意氣親莫嫌醉吻漸津津左螯右酒從君揀
東箭南金且自珍小杜豪懷言亦罪浣花癡願俗還淳
性情雖異淵源在如此詩人不可泯

重九醺席次芝房星使原韻

清淺蓬萊勞載馳星輶又值九秋時須知菊是東籬物
且采神山五色芝

浮槎偏覺日邊閒韻事仍聯兩國間徐福樓船風引去
登高誰肯說牛山

伏雨闌風忽廓澈天教九日會仙朋久欽君是龍門選
如此瀛洲幾度登

休道詩人使酒豪且隨簪履賦劉蕤曲終下里那須數
上有芙蓉白雪高

又用石埭韻

萸佩芬芳日以蘭當筵和菊入騷餐黃旗星使知長健

紅葉楓人此暫歡笑揖冠裳中坐滿怕聞風雨外邊寒

天涯雁戶隨流水搔首尊前欲說難

時聞山德島大水之報

爲澀柿園主人題其近著山中源左衛門六首

兒女情多未易牽其人如玉膽如天洩瀾萬斛鬚眉淚
齊灑關東俠少年

鴻門排闥果如何月黑風腥菟道河大嚼鐙前論肉味
始知人彘不爭多

水滸奇文續一回眉揚肉躍打插臺掀翻豈翅擎天柱
直把泰山投地來

水滸燕青在東嶽廟撲倒擎天柱任原一回奇文快絕千古本詩字治觀請相撲一段酷類此打插臺即所謂觀相撲也又俗謂岳父爲泰山

翁婿恩深怨更深敢將意氣互侵尋定知情不關生死

一線刀痕結髮心

美人雙眼識英雄皮袴叢中韞子紅莫向尊前輕蹀血
桃花便面笑春風

一死鴻毛事可悲上州讒舌詆蛾眉知君筆是擊姦笏
不待鬱宮家破時

天長節櫻洲山人寓樓招飲見示先君子琵琶湖雜
詠遺墨一幅命予依數和之即次其韻信口成十

二首

家世青衫愧克承謳歌深幸觀中興十三記把琵琶學

壓倒當年下馬陵

往年橋本春塘贈予詩有宛似蝦蟆陵下女
十三早已善琵琶之句下馬陵即蝦蟆陵

牢落江湖才久荒遺篇讀罷轉淒涼與君拚醉尋常酒

不及先人詠樂浪

先君子作此詠時山人尹江州一夕高懸
先君且飲且吟十二章立就文不加點

青山橫處敞高樓能似琵琶湖風景不祇覺使君眉颯爽

萬松翠涌御溝秋

樓屬橫山氏
前對御溝

笑出水聲山色處相邀蘭秀菊芳時鍾情我輩狂如故

為聘當筵磨墨姬

山人西都別墅曰山色水
聲莊是日召二姬佐觴

見慣司空也自歎筵前刺史似君難春風吹滿河陽縣

休使平安花柳寒

山人時將宰平安世
已喧傳下二首故及

一帶鴨河清淺流杏帘低亞碧紗幽應劉他日為賓客

煙雨東山春復秋

半庵黃葉問優婆卅六仙堂共浩歌可有美人來入道
念將梵唄付鸚哥

謬主東都風月場家翁手澤賴餘慶旗亭謾賭黃河句
一任諸君擅盛唐

徵歌選舞不嫌奢只恐西風吹鬢華淺醉倚闌低案拍
棖棖水調又琵琶

時橫山主人在樓下與其婦習歌且彈且唱靡靡可聽

幽如芳草池塘雨深似桃花春水潭最是曲終人不見
數峰江上入青嵐

主人先去

虛名枉負小森髯絕唱曾無月印潭風景依然楚雲遠
美人香草滿江南

先君子楚雲搖夢天如水湘瑟無聲月印潭香草美人秋遠近屬舟夜落古江南一篇為題畫絕唱

平日蝸廬小似舟此辰佳節祝千秋登樓誰賦滕王閣
夢落落霞孤鷺洲

清國黎受生太守 汝謙 囑題賢母蕭太夫人稻畦芸

菜圖

閉門鋤菜誰其倫母儀翻見蕭恭人經營山砦十數畝
境壤頓覺膏腴勻黔山蒼蒼墮兵劫赤眉銅馬來蹴踏
始知避亂在未萌以鉏代戈菜為甲如酥煖雨霑綠菘
流水采采春蓬蓬笑使佳兒調夕膳不知何處有宵烽
天茁此徒恭人力 宋宇種蔬三十品時雨之後按園圃曰天茁此徒助予鼎俎見豫章語 闔里晏然恭人德
卽懸一幅芸菜圖百年長侍恭人側夕陽醅酒聞孝烏

詩成再拜空長吁故林黃葉不掃久僕本識字耕田夫
除夜玉池詩龕例集題寧齋祭詩圖

檐牙簌簌霰聲集已知陰壑寒飈及坐對梅花展此圖
陽和一線吹香入寧齋讀書二十年心腸鐵石久益堅
三昧同參摩詰畫一龕時會玉池筵冰甌雪盃嬋娟助
圖中似忘歲將暮五字七字爲長城彈指嘯樓現何處
詩三兩卷酒一壺吟骨略比梅花癯買絲繡作賈島佛
嘯于樓者其仙乎天下幾人修到此不許嘯梁有窮鬼
只見四壁如空山月明如雪夜如水當其心字燒將殘
翻覺振觸來無端世事浮雲蒼狗變詩情舊雨晨星寒

何以祭之醉亦得未聞愛才如好色生當灑淚美人前
死當薶骨酒家側嗟余寡合空自豪盤胸奇氣仗酒澆
歲月磨人我磨墨卽今搦管呵霜毫春風陡轉丹青手
題詞豈敢落人後玉池別有品詩圖更索梅花開笑口

槐南集

卷十五

槐南集卷十五

249

53


1
2
3
4
5
6
7
8
9
10
11
12
13
14
15
16
17
18
19
20
21
22
23
24
25
26
27
28
29
30
31
32
33
34
35
36
37
38
39
40
41
42
43
44
45
46
47
48
49
50
51
52
53
54
55
56
57
58
59
60
61
62
63
64
65
66
67
68
69
70
71
72
73
74
75
76
77
78
79
80
81
82
83
84
85
86
87
88
89
90
91
92
93
94
95
96
97
98
99
100

11

12

13

249
4
53



219
55

魏南集

三四